

VEIJO SALOHEIMO – TVERIN KARIELAN ALGUPERÄN TUTKIJA – LÄKSI TUONILMAZIH

Igävä viesti tuli Tverin Karielah internetan verkošta myöhä yöllä 29.12.20.

Miän armaš suomalaisane velli Veijo Saloheimo šinä piänä jätti omat paikkazet, omat rodn'azet da omat tovarissazet i läksi tuonilmaziih.

Veijo Saloheimo eli hyvän i pitän elännän, hiän šyndy 6. elokuuda vuodena 1924. Hyvin tunnettu Šuomešša i muissa muakunnoissa istorijan professora Veijo Saloheimo oli tverinkarielazilla kallehena tovarissana, tiedomiehenä, kumbane avai šilmät Tverin Karielan istorijah. Läššä kakšikymmendä vuotta hiän ruado Jovenšuun linnašša Itä-Šuomen universitetašša. Saloheimo kirjutti moni kniigua, kumbazissa šellitti karielazin muottoliikehtä, kunne päin i kumbazie teitä myöten lähtei hyö pagoh Stolbovah rauhan jälgeh.

Veijo Saloheimo oli Tverin Karielašša moni kerdua, tunži karielazie kylie i kylineläjie, vet hiän toimi Šuomešša tverinkarielazin ystävien ry organizacijašša allušta šuat. Hiän oli Tverissä Pertti Virtarannanke peryštämäššä Tverinkarielazin kul'turan yhyštä v. 1990.

Myöhemmä v. 1997 Saloheimo ožallištui kanžanvälizeh konferencijah Tverissä, kumbazešša šaneli uuvet tarkat tiedot, mistä da kubazih paikkoih ažettuačettih karielazet elämäh Veniällä. Šilloin hiän ouvošti tverilazie omillah kartoilla, kumbazista nävyttih kaikki karielazin pagotiet da Tverin Karielan šyndy.

Veijo Saloheimo oli kallehena gost'ana v. 2010, konža myö tverinkarielazet pruaznuiččima 20 vuotta miän Kul'tura-avtonomijalla. Hiän oli tärgie ristikanža tverilazilla istorikoilla varoin, jogo kerdua toi lahjakši omie kirjoida, jago uutta tieduo.

Myö rubiemma muistamah miän kallista vellie Veijo Saloheimuo tunnettuna tiedomiehenä, lämbimänä hyväšiämizena muhizijana ristikanžana, kumbane oli miän tovarissana kymmenie vuožie.

Igähine muisto i taivaškuningahuoš Veijo Saloheimolla.

Nikolai Turičev, L'udmila Gromova, Zoja Turičeva, Anatoli da Zinaida Golovkinat, Galina Ponomar'ova da muut

Tverin oblastin Tverinkarielazin kul'turnoi avtonomija

Tverin linnan karielazin kul'turnoi avtonomija

Tverin valtioneuniversitetta